

“SERVICIU MILITAR”

**SAUL.-** (*El capitán, A PELAYO, el Sarxentu*). Sarxentu, faiga pasar a los reclutas.

**PELAYO.-** ¡A les sos órdenes! (*Sal PELAYO, y entra colos soldaos, too moces menos*

*DAVID en fila, que formen frente al públicu*)

**SAUL.-** ¿Qué broma ye esta, sarxentu?

**PELAYO.-** Broma denguna, señor, estos son los reclutas.

**SAUL.-** Pero si son too muyeres.

**DAVID.-** Oiga, too non, que tamién toi yo.

**SAUL.-** ¡Esto ye la lexón, equí solo tien qu’haber homes de pelo en pechu!

**PELAYO.-** Señor, esto ye lo qu’hai, y paezme a min que pelo en pechu, más bien poco.

**ESTELA.-** (*Llevanta la mano*) Oiga...

**SAUL.-** (*A voces*) ¿Cómo qu’oiga? ¡A min tráteme de señor!

**LAURA.-** Tampoco nun ye tan mayor pa tratalu de señor.

**CARMEN.-** Yo calculo que tendrá poco más o menos la nuesa edá.

**SAUL.-** ¡Silenciu! Esto ye l’exércitu, y pa falame hai que dicir señor pa escomenzar y pa terminar. ¿Ta claro?

**MARIA.-** Oiga, qu’equí sordes nun tamos denguna, nun fai falta dar voces.

**SAUL.-** ¿Qué acabo dicir?

**EVA.-** Pero, ¿coles voces que ta dando y nin usté lo oye?

**SAUL.-** ¡Señor, señor!

**EVA.-** Non, yo soi señora, o meyor dicho, señorita.

**SAUL.-** Agora mesmo me van facer doscientos flexones. ¡Al suelu! (*Solo DAVID se pon a faceles*)

**CARLA.-** Oiga, ho, que tamos cola ropa llimpio, nun vamos a tiramos agora al suelu.

**ANGELA.-** Si, qu’amás vaya traces de suelu. Equí nun se fregó va lo menos un año.

**DAVID.-** ¿Pueo entós llevantame yo? ¿O tengo que facer les de toes?

**SAUL.-** A ver, vamos ver si queda claro. Pa falar connmigo hai que dicir al principiu señor, llueu dicir lo que seya, y llueu dicir otra vez señor. A ver, sarxentu, diga un exemplu.

**PELAYO.-** Pos... Pos...

**SAUL.-** ¡Sarxentu!

**PELAYO.-** Coimes, mi capitán, qu’agora nun se m’ocurre nada que dicir.

**ESTELA.-** Oiga...

**SAUL.-** ¿Usté otra vez?

**ESTELA.-** Qu’ enantes nun me dexó dici-y que tengo que dir a mexar. ¿Onde tan los baños?

**SAUL.-** Equí nun mexa naide hasta que yo lo diga, y hasta que nun me traten como ye debío.

**LAURA.-** A min paezme que ya sé como ye. Ye, señor, ¿pueo dir a mexar, señor?

**SAUL.-** Eso ye.

**LAURA.-** Gracias, agora vengo. (*Vase*)

**PELAYO.-** Pero, ¿a onde va?

**LAURA.-** A mexar, que me dio permisu’l xeneral.

**ESTELA.-** ¿Y por qué a ella la dexa y a min non? Yo pregunté enantes.

**SAUL.-** ¡Venga, vayan y quítense de la mio vista! Pero nun minutu quiéroles a les dos de vuelta. (*Salen ESTELA y LAURA*)

**CARMEN.-** Oiga...

**MARIA.-** Di lo de señor, que si non el comandante enfádase.

**CARMEN.-** Señor, yo quería que’l mio quartu diera pal sol, que me presta nun sé cuanto asomame a ver amanecer.

**SAUL.-** (*Con sorna*) Faltaría más. ¿Y l’almuerzu llevámos-y lu a la cama?

**CARMEN.-** Sería tou un detalle.

**SAUL.-** Pero, ¿tu tas tomándome’l pelo?

**CARMEN.-** Non, señor, enantes de les dos nun tomo nada, que toi a réxime.

**EVA.-** ¿Tamién tu fía? Yo toi col de l’alcachofa, porque prebé’l del pomelu, pero nun me valió pa nada.

**ANGELA.-** Pos yo lo que quiero ye engordar, pero nun hai forma.

**CARLA.-** Será que lo gastes darréu. Ye’l metabolismu.

**ANGELA.-** Que va, a min el que me lo gasta ye’l mio mozu, y por eso llueu nun tengo perres pa comprar comida.

**MARIA.-** ¿Y funciona lo de l’alcachofa? Porque igual prebaba yo, que me sobren un par de quilucos.

**SAUL.-** (*A voces*) ¡Silenciu! ¡Silenciu! ¡Yá me tienen fartu!

**CARMEN.-** Claro, como usté nun ta a réxime, pue fartase.

**ESTELA.-** (*Vuelve con LAURA*) ¡Vaya puercos que tan los báteres! ¿Qué ye, que nun los frega naide?

**SAUL.-** Sí, agora mesmo vais vosotres dos a fregalos.

**LAURA.-** ¿El qué, ho? Col ascu que me da a min la escobiya'l bater. A ver si piensa que marché de casa por nun fregar y voi fregar equí.

**DAVID.-** (*Tovía en suelu*) Oiga, ¿yo llevántome o non? Ye qu'esto ye mui cansao.

**PELAYO.-** Llevantes cuando te lo manden, reculta.

**DAVID.-** Llámome David.

**PELAYO.-** Nel exércitu nun hai nomes, equí son toos reclutas.

**MARIA.-** Y entós, ¿cómo mos estremen?

**SAUL.-** Mui cenciello. Tu vas ser la recluta preguntona.

**MARIA.-** ¡Vaya fatura de nome!

**CARLA.-** ¿Y yo pueo ser la recluta resultona, que suena meyor?

**LAURA.-** ¡Y yo la recluta perguapa!

**ESTELA.-** Tu serás la recluta turuta.

**SAUL.-** (*A saltos en mediu*) ¡Silenciu! ¡Silenciu! A la próxima que fale enchirónola mientras dure la instrucción.

**DAVID.-** ¡Asina se fala!

**SAUL.-** ¿Qué acabo decir?

**DAVID.-** Dixo qu'a la próxima, y que yo sepa nun soi próxima, soi proximu.

**SAUL.-** (*Desesperáu*) Esto nun ye pa min. Yo pido la baxa médica por depresión. Sarxentu, son toes suyes. (*Vase*)

**PELAYO.-** ¿Míes? Ah, non, eso si que non. Que venga la Chacón a controlales. (*Marcha tamién*)

**CARLA.-** Cúntamos mentanto de la dieta l'alcachofa, anda.

**EVA.-** Ye percenciello, almuerces, comes y cenas una alcachofa.

**ANGELA.-** ¡Vaya fame!

**CARLA.-** ¿Y nun baxabes con esi réxime?

**EVA.-** Non, fía, nada de nada.

**ANGELA.-** Comerías munches.

**EVA.-** ¡Qué va! Una namás a cada comida.

**CARLA.-** Pos nun lo entiendo. ¿Y como les preparabes?

**EVA.-** Home, como nun me gusten, pa da-yos sabor, echába-yos un choricín, unes patatines... Y al final, pa quitar el mal sabor de boca, comía detrás media tableta chicolate.

**CARMEN.-** Pos yá ye raro que nun baxares, yá.

**MARIA.-** Tanto falar de comida, a min diome la fame, ¿vamos hasta la cantina a comer daqué. Creo que faen unos pinchos de callos... (*Marchen toos y queda DAVID en suelu*)

**DAVID.-** Bono, ¿y a min nun me va mandar naide que me llevante?

**TELÓN**